

各位女士，各位先生，大家好，

我是香港中小企協會會長余繼泉，今日我代表我們商會發表對公平競爭法的意見，請大家多多指教。

我地協會非常關注公平競爭法嘅發展，因為我地知道，反公平競爭嘅行爲，係會嚴重影響我地嘅社會同埋經濟嘅發展，呢啲行爲係會阻礙我地香港人進步，而且仲會扼殺中小企創業精神，直接打擊中小企嘅營商環境，同我地中小企嘅生死存亡有關，影響住好多人嘅生計；香港嘅成功，就係因為係呢廿幾三十年嚟，大家都努力朝著公平嘅理想前進，有激烈嘅競爭，先至使到我地更加優秀，但係係累積咗呢三十年嘅成績之後，有啲企業成功達致國際水平，就想壟斷個市場慢慢歎，我地絕對需要重視呢啲行爲所帶嚟嘅影響，我地相信制訂公平競爭法，係可以減少呢啲行爲，除咗使消費者得益之外，對培育新一代嘅中小企嚟講，係一個非常重要嘅條件。

睇目前無公平競爭法嘅情況下，大家嘅日常生活都見到，有好多商業機構，為咗要壟斷市場，或者要賺取最大嘅利益，唔單止唔理會政府同埋社會其他持份者嘅反對聲音，而且仲會用盡各種手段，利用自己嘅規模優勢，甚至乎跨行業嘅影響力，去阻止競爭對手出現或者有策略咁扼殺資本唔夠雄厚嘅中小企，所以就出現咗較早前有物業管理公司唔准其他報紙嚟向住客派報紙，只准住客向佢地發展商同系嘅超級市場訂購報紙嘅情況。

仲有，我地希望政府係豁免一啲機構嘅時候要特別小心，好似貿發局咁，為咗要賺更多嘅錢，竟然將大比例嘅參展位置，唔賣比香港參展商，轉而賣比非香港地區嘅參展商，香港嘅中小企唔單止得唔到公平嘅競爭，簡直就係出賣香港嘅中小企應有嘅利益，我地唔能夠坐視不理，比貿發局呢類機構豁免，唔受公平競爭法嘅監控，我地反對貿發局可以得到豁免。

不過話番轉頭，政府對推行任何新嘅法例，都應該加倍小心，睇實有無乜野副作用，或者有無任何特別受影響嘅個案，唔會因為想協助中小企得到公平嘅處境，而相反地害咗我地，係歐洲，真係有小企業因為公平競爭法而受到影響，所以我地建議係定立法例嘅初期，設立專責輔助部門，去幫助啲企業，比企業查詢同埋投訴，唔可以一時三刻就將所有仲裁交比法院。

香港政府處理呢條公平競爭法，由諮詢到而家，大大話話成二十年，但係好多香港嘅中小企對呢條法例都無了解，包括有乜野內容同埋有乜野影響，我地對香港政府係呢方面嘅宣傳工作同埋係公民教育方面係非常不滿，我地希望政府係呢方面能夠作出改善，加強公民教育同埋宣傳。

最後我地認為，如果政府能夠小心處理公平競爭法，使到佢能夠正常發揮到作用，又唔破壞我地傳統營商嘅環境嘅話，我地係非常支持呢條法例通過嘅，多謝大家。

香港中小企協會會長  
余繼泉